



UKA2019/Imm. 146

02. oktober 2019

Aqqa Samuelson

### **Utoqqaat illersuisuat pillugu Inatsisartut inatsisaat nr. xx, xx. xxx 2019-imeersoq.**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq).

Nunatsinni utoqqalineq toqqissisimanartuussaaq. Utoqqaat toqqissisimanartumik inuunillit utoqqaallu inuiaqatigiinni akuulluartut inuiaqatigiinni nukittorsaataapput. Nunatsinni utoqqalineq kikkunnik tamanik inissaqartitsinnermik misigiffiussaaq. Anguniarparput nunatsinni utoqqaat atugaasa nunani allani utoqqaat atugaannut unammillersinnaangussasut. Ukiuni aggersuni utoqqartavut amerliartussapput ukiorpassuarnilu sulilluarsimareerlutik pitsaasumik atugaqarnissaat qulakkeerneqartariaqarluni. Nunarpummi inukilliartuinnassangippat aanaakkut aataakkullu nunatsinni aamma periarfissagissaarnerusariaqarput siunnersorneqarnermikullu pitsaanerusemik atugassaqartinneqartariaqarlutik.

Nunatsinni utoqqaat amerliartornerat nuannaarutigisariaqarpoq. Utoqqaat amerliartornerat ilutigalugu nunatsinni utoqqaat isumassorneqarnerisa pisiariaqartitaannut naapertuuttuunissaa qulakkeerniarlugu Partiit Naalakkersuisullu akunnerminni suleqatigiittariaqarput.

Siunnersuutikkut Utoqqaat Illersuisuannut atugassarititaasunik utoqqaat periarfissaasa soqutigisaasalu ukkatarineqarnerulernissaannut pilersitsinissaq siunertarineqarpoq, taanna inuiaqatigiinni utoqqaat soqutigisaannik siuarsaasinnaasoq tunngavilersuutigineqarluni kiisalu sineriassami utoqqaat atugarisaat pillugit paasisitsiniaanerit ingerlassinnaassallugit. Siunertaq utoqqaat atugarisaat pillugit ullutsinni annertunerusemik paasisitsiniaasoqarnissaa tapersorsorparput. Taamaattorli utoqqaat oqaaseqartartuannik siunertaqartumik aqqissuussiniarneq eqqarsarnartortaqartillutigu. Sineriassami utoqqaat oqariartuutigisartagaat Kattuffik Utoqqaat Nipaat aqputigalugu, utoqqaat illersuisoqarfianik pilersitsinissamut siunertaq utoqqaat tapersorsoraat paasilluarparput.

Inuit Ataqatigiinni isumatusaarnerusemik aqqisoqarnissaa ujartorusupparput. Tassami sineriassami utoqqaat oqariartuutigisartagaat pisariaqartitaallu paasissagaanni siunnersorneqarnerup nukittorsarneqarnissaa ujartorneqarpoq.

Ullutsinni utoqqarnut isumassuineq kiffartuussinerlu eqqarsaatigalugit, ulluinnarnilu inuuniarnikkut atugassarititaasut pillugit utoqqaat siunnersorneqarusupput. Utoqqaat illersuisuannik pilersitsinikkut utoqqaat sineriassami qanimut tikkineqarlutik siunnersorneqartarnissaminnut pisariaqartitsinerannut matussuseeqataasinnaasoq isumaqarpugut.

# INUIT ATAQATIGIIT

## Inatsisartuni



Sinerissami Utoqqaat Peqatigiiffii aammalu Kattuffik Utoqqaat Nipaata qanimut oqaloqatigalugit tusarniaaffigisarnernani, nunatsinni utoqqaat pisortanit sullinneqarnerat eqqarsaatigalugu utoqqaat qanimut tikinneqarlutik siunnersorneqarnissamut, pitsaanerusumik ataqatigiinnerusumillu utoqqaat pisariaqartitaannut naapertuuttumik isumassorneqarnissamut pisariaqartitsinerat annertusoq paasilluarneqarsinnaavoq. Tamanna sinerissami Utoqqaat Peqatigiiffiisa aammalu Kattuffiup Utoqqaat Nipaata ukiorpaalunngortuni oqariartuutigisarpaat. Utoqqaat Peqatigiiffiisa aammalu Kattuffiup Utoqqaat Nipaata qanimut tikinneqarlutik, utoqqaallu pisariaqartitaannut naapertuuttumik isumassorneqarnissamut oqariartuutaat tusaaneqartariaqarpoq. Pisortat utoqqarnut sullissinerannut tunngatillugu, kommunini ataasiakkaani utoqqarnut politikkeqarnermi suleriaatsit, Kattuffiup Utoqqaat Nipaata ukiorpaalunngortuni utoqqarnut sullissinerani misilittakkat ilisimasallu tamaasa qulaajarluassallugit iluatinnarput.

Nunatsinni utoqqaat isumassorneqarnerat pisariaqartitaannut naapertuutissasoq Naalakkersuisut tusagassiutit aqqutigalugit nalunaaruteqarput<sup>1</sup>, kommunimi inoqarfinni tikinneqartuni assigiinngitsuni assigiimmik utoqqaat apuussinerat tunngavilersuutigalugu: Utoqqaat malillugit kommunimi nunaqarfinni illoqarfinnilu mikinerusuni utoqqarnik sullissineq assigiinngisitaartumik ingerlanneqartoq. Nuna tamakkerlugu utoqqarnut sullissineq ataqatigiissarneqartariaqarpoq. Kommunit utoqqarnut siunnersorteqarnerat nalilersuiffiqineqartariaqartoq isumaqarpugut. Kommunini tamani utoqqarnut siunnersortit qanoq atorluarneqartigippat? Utoqqaat pisariaqartitaannut naapertuuttumik kommunini siunnersuineq ingerlanneqartarpa? Tassuunakkut Naalakkersuisut kommuninut utoqqaat siunnersorneqarnerat eqqarsaatigalugu kommuninut qanoq suleqatiserinnissanerlutik erseqqissaassutigisariaqarpaat.

Nunatsinni utoqqaat pisortanit sullinneqarnerat ataqatigiinnerusoq isumassorneqarnerallu pisariaqartitaannut naapertuunnerusoq anguneqassappat Naalakkersuisut kommunillu akunnerminni suleqatigiittariaqarput, utoqqaat siunnersorneqartarnerat pillugu siunissamut isigisumik ineriartortitsinerup ingerlanneqarnissaa eqqarsaatigalugu.

Utoqqaat illersuisuannik pilersitsinissamut siunertaq tikilluaqquarput, apeqqutinillu pingaarutilinnik qulaajagassartaqarsinnaammat siunnersuutip aappassaaneeraneqannginnerani Ataatsimiititaliamut susassaartumut ingerlateqqipparput.

---

<sup>1</sup> <https://sermitsiaq.ag/kl/martha-abelsenutoqqaat-isumassorneqarnerat-pisariaqartitsinerannut-naapertuutissaag>